

KSN dilantik Pro-Canselor UMT baharu

Oleh MOHD AZLI ADLAN | 14 Mac 2024, 12:20 pm



Mohd. Zuki (lima dari kanan) diiringi Mazlan (empat dari kanan) dan pengurusan kanan UMT lain selepas menghadap Sultanah Nur Zahirah di Istana Syarqiyyah, Chendering, Kuala Terengganu baru-baru ini.

KUALA NERUS – Ketua Setiausaha Negara, Tan Sri Mohd. Zuki Ali telah dilantik sebagai Pro-Canselor Universiti Malaysia Terengganu (UMT) baharu berkuatkuasa 1 Mac lalu.

Naib Canselor UMT, Prof. Datuk Mazlan Abd. Ghafar berkata, pelantikan Mohd. Zuki bagi tempoh tiga tahun sehingga 2027 itu telah mendapat perkenan Canselor UMT, Sultanah Nur Zahirah.

“Selain itu, Tan Sri Samsudin Osman kekal sebagai Pro Canselor UMT sejak tahun 2010.

“Pelantikan beliau diyakini mampu melonjakkan lagi UMT sebagai institusi pendidikan tinggi berfokus maritim terunggul negara dan disegani global,” katanya di sini hari ini.

Mohd. Zuki merupakan anak jati Kuala Terengganu yang berkelulusan Ijazah Sarjana Muda Ekonomi dari Universiti Kebangsaan Malaysia (UKM) dan Ijazah Sarjana Pengurusan Perniagaan (Kewangan) dari Universiti Teknologi Nanyang, Singapura.

Beliau yang dilantik Ketua Setiausaha Negara sejak 31 Disember 2019 pernah berpengalaman sebagai Setiausaha Sulit Kanan Seri Paduka Baginda Yang Dipertuan Agong ke-13 dari tahun 2006 hingga 2011.

Mohd. Zuki juga pernah menyandang jawatan Ketua Pengarah Bahagian Hal Ehwal Undang-Undang, Jabatan Perdana Menteri dan Setiausaha Persekutuan Sarawak sepanjang perkhidmatan dalam sektor awam. – KOSMO! ONLINE.